

Dogri (NSD)

03-04-2026

खबरां

1. प्रधानमंत्री नरेंद्र मोदी होरें अज्ज पुदुचेरी च एनडीए मेदवार दे समर्थन च रोड शो कीता।
2. केंद्र नै राज्यें ते केंद्र शासित प्रदेशें गी एलपीजी ते होरनें पेट्रोलियम उत्पादें दी जमाखोरी ते कालाबजारी दे खिलाफ कार्रवाई करने आस्तै चिट्ठी लिखी ऐ।
3. इंडियन आयल दा आखना ऐ जे पच्छिम एशिया संघर्श दे बावजूद भारत दी एलपीजी आपूर्ति बगैर रोक जारी ऐ।
4. बंगाल पुलस नै कालीचक, मालदा मामले दे मुख् साजिशकर्ता गी सिल्लीगुड़ी दे नालडोगरा ब्हाई अड्डे थमां गिरफ्तार कीता ऐ।
5. वाणिज्य मंत्री होरें जोर दित्ता ऐ जे जन विश्वास बिल 2026 विश्वास आधारित शासन गी बढ़ावा देने आस्तै बनाया गेआ ऐ।
6. भारत मालदीव च चला'रदे एस.ए.एफ.एफ फुटबाल च अज्ज बांगलादेश कन्नै खेडगा।

<><><><><><>

PM-Puduchery

प्रधानमंत्री ते बीजेपी दे सीनियर नेता नरेंद्र मोदी होरें अज्ज संज्ञा पुदुचेरी च एनडीए मेदवार दे समर्थन च इक रोड शो कीता। 35 मिनट तगर चले दे इस रोड शो च अजंता सिग्नल जंक्शन नमां राजा थैटर सिग्नल तगर 1200 मीटर दा रस्ता तय कीता। प्रधानमंत्री इक खुल्ली गड्डी पर सवार होइयै जनता, पार्टी कार्जकर्ताएं ते सर्मिकें दा अभिवादन करदे होई हत्थ हिलांदे होई अग्गे बधे। मुख्मंत्री एन रंगासामी, भाजपा प्रदेश अध्यक्ष के.पी रामलिंगम ते गृह मंत्री ए. कोलमासिवयम होर बी प्रधानमंत्री हुंदे हे। महिलाएं, बच्चें ते सबनें उम्मी दे लोके सने बड्डी भीड़ शिड़का दी दौनें भेठें पाओर दे झंडे झोला रदी ही ते प्रधानमंत्री हुंदा फुल्लें कन्नै सोआगत करा रदी ही।

<><><><><><>

Holiday

चुनांऽ कमीशन नै सबनें राज्यें ते केंद्र शासित प्रदेशें गी निर्देश दित्ते न जे ओहू केरलम, पुदुचेरी, तमिलनाडू ते पच्छिम बंगाल च होने आहले अगामी विधानसभा चुनांए आस्तै वोटरें गी वेतन समेत छुट्टी देन। कमीशन नै आखेआ जे कुसै बी पेशे, बपार उद्योगिक प्रतिष्ठान ते बाकी कुसै बी प्रतिष्ठान च कम्म करा रदे वोटर व्यक्ति गी वोट पाने आहले दिन वेतन समेत छुट्टी दित्ती जाहग। उनें आखेआ जे छुट्टी आस्तै तनखाह च कुसै बी चाल्ली थमां कटौती नेई कीती जाहग ते जेकर कोई इस प्रावधान दी उल्लंघना करदा ऐ तां उसी जुर्माना लाया जाहग। कमीशन नै आखेआ जे डेलीवेजर ते कैजुअल वर्करें गी बी इस चाल्ली दी गै छुट्टी दित्ती जाहग।



LPG

केंद्र सरकारै राज्यें ते केंद्र शासित प्रदेशें गी LPG ते होर दुए petroleum उत्पादें दी जमाखोरी ते कालाबजारी गी रोकने ताई लोडचदी कार्रवाई करने लेई आखेआ ऐ। पेट्रोलियम ते कुदरती गैस मंत्रालय दे सैक्रेटरी डॉ. नीरज मित्तल होरें इस सरबन्धै च राज्यें ते केंद्र शासित प्रदेश गी खत लिखेआ ऐं श्री मित्तल होरें आखेआ जे किश इलाकें च अफवां ते गलत जानकारी फैला करदियां न जिस करियै लोक बेमतलब चैंता ते घबराहट च खरीदारी करा करदे न। राज्यें गी जमाखोरी, हेराफेरी ते घबराहट पैदा करने आहिलयें गलत सूचनाएं दे फैलने पर नेइमी ते सख्त निगरानी रखने दी बी सलाह दित्ती गई ऐ।



India-LPG

पच्छमी एशिया च चला'रदी भुगौलिक राजनीतिक उथल-पुथल दे बावजूद भारत च एलपीजी दी आपूर्ति स्थिर ते भंडार काफी ऐ। इक बयान च इंडियन आयल ने आखेआ ऐ जे घरें तोड़ी एलपीजी आपूर्ति बगैर कुसा रूकावट दे जारी ऐ ते मौजूदा समें च हर रोज 28 लक्ख एलपीजी सिलेंडर दित्ते जा रदे न जेड़ा के मौजूदा वैश्विक संकट कोला पैहले दे आंकडत्रे दे बराबर गै ऐ। कंपनी नै उपभोक्ताएं गी एसएमएस ते आई.वी.आर.एस ज्नेह डिजिटल मोड दा इस्तेमाल करियै गैस दी बुकिंग कराने आस्तै प्रोत्साहित करदे होई आखेआ गेआ ऐ जे 87 फीसदी बुकिंग डिजिटल प्लैटफार्म जरिए होआ'रदियां न। जमाखोरें ते कालाबजारी दी रोक आस्तै टीमां चानचक्क जांच करा करदियां न। 7 ज्हार 500 निरीक्षण कीते जाई चुके दे न ते 141 गैस डिस्ट्रीब्यूटरें खलाफ कार्रवाई बी कीती गई ऐ।

West Bengal Police

पच्छिम बंगाल पुलिस नै अज्ज मालदा जिले च 7 न्यायिक अधिकारिणं गी घेरने दे मुख्ख साजिशकर्ता सने 2 लोकें गी सिलीगुडी दे बागडोगरा ब्हाई अड्डे थमां गिरफ्तार कीता। आरोपी दी पंछान एडवोकेट मोफकरूल इलाम दे रूपै च होई ऐ। उसी ज्हाजें पर चढने दी कोशिश करदे मौके गिरफ्तार कीता गेआ। पत्रकारें कन्नै गल्लबात करदे होई एडीजी के जयराजन होरें दस्सेआ जे बुधवारें भाशनें दे राहें मुकामी लोकें गी भटकाने दे आरोप च आरोपी दे खलाफ काली चक पुलिस स्टेशन च 3 मामले दर्ज कीते गे न।

<><><><><><>

Indian-Navy

भारती नौसेना नै अज्ज विशाखापत्तम स्थित नौसेना डाकयार्ड च स्टीलन फ्रिंट आईएनएस तारागिरी गी शामिल कीता। केंद्री रक्ष मंत्री राजनाथ सिंह होरें समारोह दी अध्यक्षता कीती। मजगांव डाक शिपबिल्डर लिमिटेड आसेआ तैयार एह युद्धपोत परियोजना 17एं श्रेणी दा चौथा पोत ऐ। इसी शामिल करने करी भारत दी स्वदेशी नौसेना क्षमता मजबूत होई ऐ। सभा गी संबोधित करदे होई रक्षा मंत्री होरें आखेआ जे 2047 तगर विकसित राष्ट्र बनने दे आस्तै भारत दी समुंद्री शक्ति मती जरूरी ऐ। उनें आखेआ जे देश दी समुंद्री सीमा 11 ज्हार किलोमीटर थमां बी मती लम्मी ऐ ते 3 बक्खियें थमां समुंद्र कन्नै घिरी दी ऐ। भारत दा तकरीबन 95 प्रतिशत बपार समुंद्री रस्ते थमां होंदा ऐ जेह्के उर्जा सुरक्षा बी समुंद्र पर निर्भर ऐ। उनें इस बरी जोर दित्ता जे इक मजबूत नौसेना अत्त जरूरी ऐ।

<><><><><><>

LG-Inquiry

उपराज्यपाल मनोज सिन्हा होरें गांदरबल जिले च होए दे टाकरे दी मैजिस्ट्रेट जांच दे अज्ज हुक्म जारी कीते। इस टाकरे च सुरक्षा बलें इक कथित आतंकवादी गी मारी मकाया हा। मुख्खमंत्री उमर अब्दुल्ला ते पीडीपी दियां प्रधान महबूबा मुफ्ती हुंदे सने मुख्खधारा दे नेकें लीडरें मंगलवार ते बुधवार दी दरम्यानी रात च लगगे दे इस टाकरे पर सोआल पुट्टे हे। श्री सिन्हा होरें एक्स पर इक पोस्ट च आखेआ जे उनें अरहामा गांदरबल आहली वारदात दी पूरी ते निरपक्ख मैजिस्ट्रेट जांच दे आदेश दित्ते न। एह जांच घटना कन्नै जुडे दे सबनें पहलुएं दी जांच करोग ते इस गल्ला गी यकीनी बनाग जे न्याऽ मिले। मारे गेदे नौजवान राशिद अहमद मुगल दे परोआर आहलें दावा कीता हा जे राशिद दा आतंकवाद कन्नै कोई लैना-देना नेई हा। एहदे शा पैहले मुख्खमंत्री उमर अब्दुल्ला होरें आखेआ ऐ जे परोआर दे इस दावे गी सिरे थमां खारिज नेई कीता जाना चाइदा। जम्मू-कश्मीर गृह विभाग नै गांदरबल दे जिला मैजिस्ट्रेट गी आखेआ ऐ जे ओह 7 दिनें दे अंदर-अंदर जांच मुकम्म करोआन।

IAF-Sam Manekshaw

भारती ब्हाई सेना नै अज्ज भारत दे पैहले फील्ड मार्शल सैम मानेक शा होरें'गी उंदी जयंती मौके चेता कीता। सोशल मीडिया पर इक्क पोस्ट च ब्हाई सेना नै आखेआ जे सैम मानेक शा बेजोड़ दलेरी, बुद्धिमान बेमिसाल नुमायंदगी दी समर्था रखने आहले फौजी अफसर हे। उनें साफगोई ते पक्के भरोसे कन्नै भारती फौजी इतिहास दे फैसलाकुन लम्हें गी आकार दिता। उंदी अमर विरासत पीढ़ियें दे योद्धाएं गी पक्के धेइयै, सच्चाई, ईमानदारी ते मकसद कन्नै नुमायंदगी करने लेई प्रेरित करदी रौहग।



Custom Duty Exemption

उद्योग इकाइएं जरूरी पेट्रोकेमिकल उत्पादें दी बक्ख-बक्ख श्रेणिएं पर कस्टम ड्यूटी हटाने दे सरकार दे फैसले दा स्वागत कीता ऐ। मीडिया कन्नै गल्ल करदे हेई फेडरेशन ऑफ आटोमोबाइल डीलर्स एसोसिएशन दे मुख कार्जकारी अधिकारी सहर्ष दमानी होरें आखेआ जे सरकार आसेआ अच्छा कदम ऐ जेदे करी गड़िणं दे क्षेत्र गी राहत लब्बोग। उनें आखेआ जे बड़ी सारी चीजें दे उत्पादन च पेट्रोकेमिकल्स दा इस्तेमाल हुंदा ऐ ते इस छूट कन्नै चीजें दी कीमतां बी काबू च रौहंगन। तोआई, इंडियन ड्रग मैनुफैक्चर्स एसोसिएशन दे राश्ट्री प्रधान डॉ. विरांची शाह होरें आखेआ जे आयात ड्यूटी हटने करी जरूरी रसायनं ते उत्पादन प्रक्रिया पर खर्चा घट्ट होई जाहग ते एहदे कन्नै पूरे भरात च वाजिब भाएं पर दोआइणं दी आपूर्ति जारी रौहग।



Commerce-Minister

वाणिज्य ते उद्योग मंत्री पीयूष गोयल होरें आखेआ ऐ जे जन विश्वास (प्रावधान संशोधन) बिल 2026 च कीते गेदे सुधार कनून गी सौक्खा बनाने ते पालमा दे भारत ते जुमनि दे डर गी घट्ट करने दी बक्खी इक महत्वपूर्ण गैऽ ऐ। अज्ज नमीं दिल्ली च बिल पर इक प्रेस कांफ्रेंस गी संबाधित करदे होई श्री गोयल होरें आखेआ जे बिल दा मकसद आम जनता गी काबू करना नेई सगुआं उनेंगी लाहू पजाना ते जीवन ते बपार गी सौक्खा बनाने आस्तै विश्वास आधारित शासन गी बढ़ावा देना ऐ। श्री गोयल होरें आखेआ जे जन विश्वास बिल दे माध्यम राहें पैहली बारी 79 अधिनियमं तैहत इक ज्हार अपराधें गी अपराधें दी सूची थमां बाहर कीता गेआ ऐ। उनें आखेआ जे एहू बिल विकसित भारत 2047 दी भेठा देश दी यात्रा च इक महत्वपूर्ण मील दा पत्थर ऐ।

NCERT

शिक्षा मंत्रालय नै सलाह दिती ऐ जे राश्ट्री शैक्षणिक अनुसंधान कौंसल गी इक बक्खरी श्रेणी दे तैहत डीम्ड युनिवर्सिटी घोशित कीता जा। अपने बयान च मंत्रालय नै आखेआ जे एन.सी.ई.आर.टी गी डीम्ड युनिवर्सिटी दा दर्जा देने आस्तै यूजीसी पोर्टल पर इक आनलाइन आवेदन अपलोड कीता गेआ हा। मंत्रालय नै आखेआ जे यूजीसी विश्ेषज्ञ कमेटी दी सिफारिशें गी कमीशन नै मन्नी लैता ऐ। मंत्रालय नै एनसीईआरटी गी अनुसंधान कार्यक्रमें दे कन्नै-कन्नै डाक्टरेट ते नवाचारी शैक्षणिक कार्यक्रमें गी शुरू करने दे निर्देश दित्ते न। एनसीईआरटी इक स्थापित संगठन ऐ जेदी स्थापना 1961 च सरकार आसेआ स्कूली शिक्षा च गुणमात्मक सुधार आस्तै केंद्र ते राज्यें सरकार गी सलाह देने आस्तै कीती ही।

<><><><><><>

Pak-Blast

पाकिस्तान च कल रातीं खैबर पख्तूनख्वा दे बन्नू जिले दे इक पुलस स्टेशन पर आत्मघाती कार बम कन्नै हमला होआ जेदे च इक्कै परिवार दे 4 लोकें सने 5 लोकें दी मौत होई गई ते 13 होर घायल होई गे। हमलावरें विस्फोटकें कन्नै भरोची दी गड्डी गी पुलस स्टेशन दे पिछले हिस्से गी टक्कर मारी जेदे करी केई मील दूर तगर धमाके दियां बाज सुनी गई।

<><><><><><>

SAFF

मौजूदा चैंपियन भारत अज्ज मालदीप च दक्खन एशियाई फुटबॉल महासंघ सैफ अंडर-20 प्रतियोगिता दे फाइनल च बांगलादेश कन्नै खेडगा। मैच भारती समें मताबक रातीं साड्डे 8 बजे होगा।

<><><><><><>